

志者史之支流也上以宣揚

鄧治下以備稽考而寓勸懲居其

地者食舊德服先疇憬然於古
來興廢安危之故復油然而生其
孝弟廉恥之心必其官斯土者

顧名思義愛物心臧而後筆之
於書乃能精神貫注總舉目
張使千百年政事文章与夫官
方民俗之有闕人心世道者瞭
如秩如冰徒摭拾陳言徵文考

獻已也寧海古嶧夷地山有崑
崙之高水有滄溟之大其間權
奇個儻之卓有可傳者代不乏
人披閱舊志十卷為

國朝康熙二十年間前州牧奉檄脩

輯僅列星野山川人物而藝文
關如致令千百年政事文章与
夫官方民俗之有闕人心世道
者胥歸散佚識者慨焉 磐林
刺史具良史才癸亥夏來牧是

州實心行政治具畢張以大者
遠者為已任慨然於舊志之闕
略而亟謀重修與都人士網羅
放失舊聞得邑諸生宮卜萬所
訂證錄如千卷悉心審訂端

者正之略者詳之五閱月而編
輯始成屬序於余憶余輟跡所
至幾半天下所見郡縣志汗牛
充棟而相沿之通病或競尚浮
誇凡古蹟人物率附會偽托而

不顧其安則失諸濫或刻期
藏事凡嘉言懿行率漫滅遺
亾而不求其備則失諸陋求其
體例謹嚴考證詳覈者莫如
陸清獻公靈壽縣志今刺史垂訂

是書其大要不外字裁鎔古今
討論掌故使千百年政事文章
与夫官方民俗之有關人心世道
者莫不一一搜求而詳覈之視
陸清獻靈壽一志差可頡頏今

而後考風問俗讀其書如入其境而居其地者有不憬然於古來興廢安危之故油然而生其孝弟廉恥之心耶 刺史明德之後其尊人觀察公清修碩望為名世巨

曾守吾蘇惠政循聲藉：人口今刺史恪守家風罔敢失墜當更有大者遠者上佐

盛世宏此遠謨是志所書豈僅為司牧者採風之一助哉是為序

同治三年春三月朔日山東
分守登萊青兵備道兼

東海關監督古吳潘霽

撰并書



牟平古牟子國環山濱海民俗
樸茂舊志十卷纂自康熙壬子
迄今百九十年矣文獻之代興
忠孝節烈之繼起不知凡幾時
移世易陵谷變遷文物聲名亦

將漸歸湮沒焉踵而修之良牧
民者急務哉然而徵文考獻必
賴經濟才也蒐闕補遺必藉淹
雅士也伊古郡國志乘如陸機
洛陽記常璩華陽國志雷次宗

豫章古今記范成大桂海虞衡志樂史太平寰宇記類皆宏通淹貫之儒政事文章之手纂輯修定故能魚、雅、炳耀一時流傳百世然則修志一事信乎

非良史才不足以當之非良吏才亦不足以當之矣 磐升刺史西江名孝廉治術學術得自超庭癸亥季夏自膠東移牧是州蒞任之初慨舊志之殘缺亟

謀所以新之網羅散佚得官生
卜萬所著證、錄若干卷參酌
而潤色之逾年書成索弁言於
余余之譎陋何足以言文第念
守此邦也于今三年嘗與郡中

賢士大夫議修郡志各邑志乘
年來次第徧覽獨福山志詳審
精當體例謹嚴而其書燬於兵
火近始由棲霞林生夢鐸蒐羅
得之諸志中擇不精語不詳者

居多甯海舊志尤甚人文典籍
不無雖善無徵之憾今幸得賢
刺史修之既喜補遺蒐闕先得
我心而是邦文獻與夫忠孝節
烈得是書傳之均可千古焉刺

史不特有良吏才兼有良史才
矣是為序

同治三年夏四月浴佛日知登
州府事世襲二等輕車都尉
長白豫山撰并書



重修甯海州志序

省府州縣皆有志非僅記山川
人物也亦以寓政教勸勵之權
焉雖省志府志州縣志有多少
繁簡之不同而體例則一甯海

州舊志修於康熙初年僅止二
帙迄今一百八十餘年事實蓋
闕如也於此而欲重修徵文考
獻豈易言哉余於癸亥夏來牧
是州於山仰崑崙之高於水俯

滄溟之大與士大夫之仁者賢者相接悉其風俗之質樸閱其文藝之英華訟簡賦輕猶得公餘補習舊業顧而樂之不禁有久於其任之思乃綜應理公事

而謀其大者遠者先舉行之則莫要於志書矣然而鸞樓鳳閣非凌空結撰所能造也紀事述言非附會傳聞所可憑也於此而欲重修徵文考獻豈易言哉

人心造事誠則必通感無弗應
宮卜萬者邑故諸生也立品勤
學為鄉里稱而獨慨惜於州志
之不修平生考究數十年殘碑
斷簡靡不搜求懿行嘉言靡不

註記著為備志凡若干卷曰證
證錄圖畫抄寫不敢自居為修
志也吁是可謂有心人也矣生
歿於丁未年其書即於是年止
聞其遺子弟言曰後有修志者

此書當有可采慎藏之前歲寇
匪竄擾宮生家亦被燬此書獨
存無恙余蒞任後訪求其書得
之其姪宮寶田手乃詳為披閱
其未盡善者邀集賢士大夫悉

心刪訂以近十餘年事實並附
益之自天文以迄仙釋分明計
有十類都為一書付諸手民於
甲子仲夏剞劂告竣乃綴言於
簡端曰余年十餘齡時隨侍先

公宰長清修志與校字之役後
二十年回靖安本籍續修邑志
先公諭曰志書美善無過於陸
清獻公靈壽縣志者其序有云
靈壽土瘠民貧居官者知此然

後不敢以紛更聚斂為事土著
者知此然後不敢以奢華侈蕩
為能綱領所在隨處提醒此名
賢覺世之言非可以志書尋常
論也甯海古牟子國歷代沿革

在志已詳居山陬海澨之間民
艱於食常仰販粟於關東亦所
謂土瘠民貧者矣惟居官者因
土瘠而思有以肥之民貧而思
有以富之且有以教之為地方

造福此吾志也若乃土瘠而猶
朘削以自肥民貧而更侵吞以
自富為地方造孽豈吾志哉至
於土著其秀杰者文章道德炳
耀無窮其樸愿者恒產恒心古

風尚在而近年來軍國急要之
務無不踊躍輸將寇盜蹂躪之
時又能同心守禦忠義節烈流
芳千古尤於志乘有光焉仰京
兆之政績居官者足以志矣慕

會稽之清標土著者足以志矣
同治三年夏五月既望候選知
府山東登州府甯海州知州
江西靖安舒孔安撰并書

